

Nurul Sarah juarai 100m, olahraga rangkul 4 pingat emas

# Kejutan dari Vientiane



**NURUL Sarah Abdul Kadir bersama pingat emas yang dimenangi di Vientiane, semalam.**

**VIENTIANE** - Nurul Sarah Abdul Kadir melakar kejutan pada Sukan Universiti ASEAN apabila merangkul pingat emas 100 meter wanita untuk menyumbangkan satu daripada empat emas yang dipungut olahraga pada hari pertama acara tersebut di Stadium Utama, Kompleks Sukan Nasional di sini, semalam.

Lebih manis lagi penuntut Universiti Putra Malaysia (UPM) berusia 24 tahun itu mengetepikan pemenang pingat emas Sukan SEA Indonesia 2011, Unani Serafi dengan catatan masa 12.14 saat.

Unani sekadar menamatkan saingan di kedudukan ketiga menerusi catatan 12.34 saat, di belakang atlet Thailand, Pimpika Kannikom yang mencatat 12.15s.

Biarpun meraih emas tidak diduga, namun Nurul Sarah ketika ditemui pemberita melahirkan rasa tidak puas hatinya terhadap catatan masa yang dilakukan, semalam.

Dia memiliki rekod peribadi ter-

**AIZAWATI AHMAD**

Melaporkan dari  
**VIENTIANE, LAOS**



baik 11.83s yang dicipta di *venue* yang sama pada Sukan SEA Laos 2009.

“Catatan masa saya tidak begitu bagus walaupun saya menang emas.

“Lawan saya hari ini (semalam) adalah wajah-wajah biasa yang saya temui setiap kali menyertai pertandingan di luar negara, jadi, kami sebenarnya tahu kekuatan masing-masing,” katanya.

Malaysia meneruskan rentak cemerlang merangkul emas dan perak dalam acara 400 meter lelaki menerusi Mohamad Arif Zulhili Alet serta S. Kannathasan.

Arif dan Kannathasan masing-masing melakukan catatan ma-

sa terpantas 48.16s dan 48.21s meninggalkan atlet Thailand, Jakkrit Pattasai sekadar meraih gangsa dengan masa 48.47s.

Emas dan perak turut menjadi milik negara menerusi acara lompat kijang apabila Mohd. Hakimi Ismail serta Mohd. Amar Fitri Zainol melakukan lompatan 15.62 meter dan 15.47m.

Gangsa pula dimenangi peserta dari Indonesia, Asril Abdullah yang mencipta lompatan 15.15m.

Satu lagi emas milik Malaysia diraih melalui atlet lontar tukul besi, Jackie Wong Siew Cheer dalam acara yang dilangsungkan pada sebelah pagi.

Jacike mengetepikan cabaran wakil Thailand, Patipan Sangsing dan Trinh Tan Nhanh dari Vietnam.

Dalam acara 100 meter lelaki, atlet negara, Mohd. Noor Imran Hadi sekadar meraih pingat perak dengan catatan masa 10.56s.

Dia tewas di belakang jaguh pecut Singapura, Gary Yeo Foo Ee yang mencatat kepantasan 10.44s.

Rakan senegara Gary, Calvin Kang Li Loong pula membawa pulang gangsa menerusi catatan masa 10.57s. - UTUSAN



**16<sup>th</sup> ASEAN UNIVERSITY GAMES**  
Vientiane Laos 2012